



**Sessione di l'Assemblea di Corsica
U 30 d'aprile di u 2020
Discorsu di u Presidente*
Jean-Guy Talamoni**

Care cunsigliere, cari cunsiglieri,

Avemmu amparatu incù assai tristezza a morte di u nostru anzianu collegu è amicu Pierre Chaubon. Era un ghjuristu è un elettu di gran valore. Ci manca digià, cum'ellu mancherà à a vita pulitica corsa. Pensemmu naturalmente à tutti i soi.

Vi dumandu d'usservà un minutu di silenziu.

Hè sanitaria, economica è suciale a crisa di u Covid-19.

Per l'aspetti sanitari, sò millaie i circadori à travaglià ci, à circà un trattamentu o un vaccinu. Aspettendu una suluzione scientifica, ùn avemu chè mezi fisichi di difesa cù l'allontanamentu suciale è u rispettu di gesti di difesa.

Sta situazione sanitaria hà purtatu quasi tutta l'umanità à rispettà misure di cunfinamentu mai messe in ballu à stu livellu custi. In tanti paesi di u mondu, si sò firmate quasi tutte l'attività economiche. Più circolazione nant'è e strade, più ghjochi in e scole. Chjose e sale di spettaculu, chjosi i terreni di ballò. Aeruporti bioti è ottelli diserti. Cunosce a nostra isula una situazione chì tutte e previsione turistiche e più pessime ùn pudianu imaginà. A cuncertazione ch'avemu avutu eri cù u ministru è l'inseme di i socioprofessionali ci lascia prevede una stagione nera è ci dumanda d'imaginà inseme suluzione per sustene famiglie sane chì anu creatu è sviluppatu u so strumentu di travagliu.

Senza più nisuna attività economica, a situazione suciale di a nostra isula, territoriu cù u livellu u più altu di puvertà, cù l'inugualità e più alte dinù, vene torna imepghjurita. Ancu di grazia, associ, paisani, imprese dinù venenu in aiutu à l'altri. À contu meiu, u più di primura si ghjoca quì. À chì ci ghjuverà di vince u Covid, s'è no perdimu a nostra umanità ? Chì serebbe a senza senza a ghjustizia, chì serebbe un mondu senza Covid ma senza più presenza umana dinù ?

« L'épreuve ne tourne jamais vers nous le visage que nous attendions » scriveria François Mauriac. S'è no aspettemu oramai tantu da e scuperte di i medichi è di i circadori, pensu chì a battaglia contr'à u Covid-19, ci chjama dinù, ci chjama di più, à purtà suluzione à l'organizzazione di a nostra sucetà. Frà ste suluzione, sò oramai trè anni chì a cummissione per un rivenutu universale travaglia nant'à l'evuluzione di l'impiegu, nant'à i limiti di u sistema suciale, nant'à e forme nove di solidarità da inventà. Simu infine ghjunti à compie stu travagliu di cuncertazione cù istituzione, filosofi, sociologhi è ecunumisti dinù.

Ci vegu per contu meiu parecchi vantaghji, moltu più in a situazione attuale chì, a sapemu, hà da durà è s'hà da impeghjurisce.

U rivenutu universale permette di sguassà l'effetti perversi di e prestazione suciale. U primu hè l'assenza di ricorsu di i più debbuli à i so diritti, u secondu, liatu cù u primu, hè l'effettu di stigmatizzazione liatu à e prestazione suciale. Al di là di a risposta suciale purtata à e situazione d'addisperu, hè dinù una risposta à l'altezza di u bisognu di ricunniscenza di a dignità di a ghjente. Purtà un altru sguardu nant'à u più debbule, hè un primu passu à prò di l'inclusione. U più debbule cum'è u più putente puderanu allora turnà à crede in a so umanità cumuna.

In e nostre sucetà cuntempurane, per via di a reattività di stu dispositivu, u rivenutu universale porghje suluzione à l'evuluzione di e situazione famigliale cù un adattazione à i veri bisogni, quelli attuali di a ghjente. Hè dinù una vera reta di securità, una securità suciale per tutti, senza cundizione, una reta micca per intrappulà a ghjente cum'è pesci, ma una reta per ribumbà, per rialzà si, per saltà.

In una sucetà inuguale, chì l'inuguaglià passanu per a nurmalità o per una fatalità, venenu accittati i determinisimi suciali. Eppure, oghje ghjornu, i Corsi, cum'è l'altri, ùn cercanu più à serve qualsiasi signore o signurellu. A brama, u bisognu di sputichezza di l'individuu u porta à seguità a so vucazione, à esse ellu stessu, circhendu spannamentu trà vita suciale è vita professionale. Permette dinù un equilibriu in u raportu di forza trà l'impiegatu è u patrone è una più grande assicuranza di i diritti suciali cum'è diritti creanza.

L'averete capita, cù u rivenutu universale, ùn avemu micca inventatu un'altra volta l'arte di michelazzu. Forti di i nostri valori, avemu circatu à truvà li un sboccu in a sucetà oghjinca per pudè cuntinuà à fà sucetà, in seme.

A ringrazià vi.

*Seul le prononcé fait foi

Contact presse : Julia Marchini– 06 03 66 94 80